

吳
興
藝
文
補

吳興藝文補卷之四十目錄

李光縉

序韓求仲先生文閣

焦竑

書歐餘漫錄

鄭明選

歸安人

八閩大雅錄序

爲沈公倬弟

碧巖志序

天聖寺古檜閣碑記

遊峴山記

遊玲瓏山記

遊黑龍洞記

遊自碧浪湖至月湖記

遊下菰城記

沈傲灼

見前

吳興沈氏重修族譜敘

王穉登

喜留亭記

爲郡守陳公幼學

如松和尚造法華山路募緣疏

袁宏道

答沈何山儀部書

謝肇淛

郡司理

遊峴山記

募修歸雲菴疏

湯賓尹

題韓求仲四書選文全編

黃汝亨

太僕卿懷恩諱老先生偕沈淑人八十壽序

策衡序

高士吳允兆先生傳

名夢陽歸安人

吳文企

郡守

桑葦園記

玉筍帖跋

吳夢陽

歸安人

增定玉壺冰序

香圓圖贊

木竹杖銘爲心丁長老賦

答閔康侯書

米雲卿

懷愚韓公暨沈淑人八十雙壽序

代

火連倡

蔡善繼

烏程人

福山禪院放生池募建佛閣疏

葉秉敬

題閔康侯草堂咫園吟咏序

王衡

與沈泰垣督學書

姚祚端

擬進

神宗皇帝保泰箴

馬之駿

答潘昭度父母啓

胡胤嘉

九日泛苕溪詩序

遊峴山漫記

不溪偶記

臧昇

長興人

復兩省設兵議

謝先申

德清澈溪嵇氏族譜序

魏大中

答雲南撫院閔曾泉書

沈師昌

心丁血書華嚴疏

閔光德

宗伯曾孫

蒹葭舍記

范夫人

與董遐周表弟書

吳興藝文補卷之四十目錄

終

吳興藝文補卷之四十

烏程董斯張遐周彙編

閔元衢康侯叅輯

韓昌箕仲弓增定

序韓求仲先生文閣

李光縉

余謝罷征途匿影山中焚棄筆研却蠹魚不與親門無
干旄之至有至者逃不出見戒閤人勿納刺鍵戶獨嘯
取適自喻一日蒼頭入告有持書自雪上來者余笑非
遺我也誤耳使辭之其人入見指余姓名爲詢余訊之
乃知爲求仲韓先生書嗟夫先生文名滿天下不遠數

千里問淪棄老生何歟已授書則有文在文閣二集與
其書偕來余啓函因而卒業集皆應制言文四千六百
餘首先生各自序之而又有宣城湯先生茗水沈先生
言弁諸首宣城先生咨嗟反覆於文在之天蓋有他人
不能喻而先生獨自傷者吾以爲宇宙雖大真文章有
幾自有宣城師弟子之文行于世文何時不在而問他
名家也維是先生之序文閑欲自附于孟夫子之閑先
聖其憂深慮遠之意不能不使人有概于中余生平精
心此蘧今已矣乃老驥伏櫪時猶悲鳴每遇試文出耶

讀之見其破壞割裂日甚一日輒私自痛恨而且不無
望于有位能文者之人竟無有人焉能起而振之今幸
而獲見先生斯刻則然爲鵠于天下其蒿恒之心與網
羅之力讀者如見而矧其雅志同抱者也夫文之敝也
積漸以至非獨其士人失也當上與下之人兼受其責
今天下無文矣其敝不在奇在庸庸而人誤奇之不在
異在同同而人誤異之似是而非此唱彼和讀之若不
可以句索之則淺陋而無味誦之竟篇至令人不知作
此題目初第一二弄巧負名之人爲之本無文品偶然

弋獲遂以簣世後率多庸衆人勦襲效之亦或不察而
亟收之士當操觚時寧有遠志第爲射富貴功名地耳
何知仁義享利者爲有德爲深造之文難爲餽飭之文
易被見上人所收錄而易欺者在彼所擯棄而難逢者
在此誰有爲其難而不以僥萬一之售者固宜其江河
日下波瀾川逝而不可返今治估解爲辭之人卽後來
操政事之人今以言應舉之人卽後來取人以言之人
其伎止此則其見止此所繇進身之路亦止此自率率
人展轉相仍夫寧有極此孟夫子所謂相率而遷仁義

者也韓昌黎謂之塞路正路塞則邪徑開矣今天下文
率繇邪徑以行惡得勿閑以文閑文文不可得而閑也
以秉文閑文始可得而閑也孟子之閑聖道拒之放
之非盡拒放虛弄舌端之人必其有生心而作政事之
權能盈人以言而顛倒天下者耳彼街談巷議之口如
隙中之鬬市閑之爭則亦何煩置喙矣身閑之不得而
始望於能言拒者之人夫非得政可言之人與其人又
不可得乃身自守而以待來學夫亦真不得已者矣先
生之爲斯刻倘亦不得已之心乎竊謂閑今之士變今

之文必有高天下之才無其才則不能開必有高天下之膽無其膽則不敢開又必有高天下之位無其位則不得開而又必天未喪文道不終否之時無其時開之終難爲力往者嘉靖之季文靡蔓極矣乙丑南宮之役司文者挾其才與膽乘秉文之任與士心思變之時一舉而澄汰之天下文遂翕然而歸于正施及隆萬之間斌斌稱盛此其往事已文在者位未必在位在者文未必在兩者缺一化成實難先生有其文未有其位而先有其開文之志令觀人文者盡人人如先生豈憂文壞

哉今 天子起先生田間固將出矣韓昌黎之起衰溺
歐陽永叔之變軋苗此亦先生異日任也先生今以此
而待學者夫卽有真豪傑聞風而響應先生者矣先生
之功大矣哉

書歐餘漫錄

焦 竑

古小說家蓋出於稗官街談巷語道聽途說者之所造
也漢藝文志六藝九種凡百三家僅三千餘篇而小說
十五家乃至千三百八十篇其多如此歷世寢遠莫可
攷見唐宋以來作者猥衆大都委瑣不經往往居半牴

於睡餘語隙酒杯流行爲一笑之助而已溫公修通鑑
爲人倫之檢鏡非正論弗收然如鬼書武三思之門血
灑楊謹矜之墓以其可爲鑒也卽小說而備采之善乎
太史遷之言天道恢恢談言微中亦可以解禁豈不信
哉吳興閔君康侯英年績學樂善好古每有見聞輒登
之錄纒纒數萬言糾傳聞之譌補史乘之闕闡先世之
轍事拾名賢之偉撰此古稱有爲而作者雖典常俶詭
固見迭出與尋常稗官者流異矣昔劉原父簡王深父
云足下與原父不好小說任作端士貢父自看小說不

害爲通人然則通人端士合而爲一人者康侯也夫

八閩大雅錄序

鄭明選

國朝以經學取士其初文章渾厚典則粹然一出于正
近世學者乃始變爲鉤棘怪誕之詞又錯以釋老莊列
百家之學竄入其中競相放效自以爲奇而文體大壞
夫文者士所爲也然其變常在上不在下昔歐陽修知
貢舉黜劉幾軋苗之文文體復正故主司者文章之薨
也予同歲進士沈泰垣公夙有文譽主爵者以八閩多
士之區宜得名士督學校事遂以公行校士旣畢提其

異等者剗剗之標曰大雅錄夫雅者正也周公作爾雅
詩曰雅詩樂曰雅樂皆古聖人所作也並以雅名何則
道根于雅也文以闡道文之不雅是倍道也是故任僞
離韎之音不可以登明堂魚龍幻人之戲不可以舞兩
晉說淫詞豈可陳于儒者之門哉孔子曰辭有險易
者兩科壹歸于正故文者以正爲宗而奇行乎其中
奇出于自然奇亦正也韓子曰易奇而法詩正而葩奇
本于法也葩本于正也夫是之謂至文今夫江河天下
之巨川也方其行乎平地也悠悠浩浩終日安流而不

忽及其經乎龍門伊闕瞿塘滄瀨之間東以懸崖截以
巨石乃始有驚濤急湍震撼汙淠或天地駭日月而水
之奇見然皆激于勢之自然非作而爲之若乃海水無
故而溢穀洛無故而闢斯則異耳豈奇也哉是故知奇
之爲正又知詭之非奇可與言大雅矣予竊怪夫詭于
文者嘗嘆曰世無歐陽子耳今八閩有公大雅復作予
不覺躍然以喜也忘其鄙陋而爲之序云

碧巖志序

鄭明選

地之志昉於九丘山經九丘亡矣而山經猶存其後有

水經有地理志彼皆內該神州外羅四荒其地廣其文約中間峯巒水石之勝人物之所生及風氣所宜與夫古今興廢之蹟以至于風人學士所游覽而題詠者摭拾難周不無遺漏於是好事者取名山巨鎮各自爲志地專而文縱紀載詳矣我郡弁山有三巖碧巖爲最勝余壯歲嘗登之其上有龍口爐峯捨身巖鸚鵡七星之石瀑布之水其下太湖滌瀆無際洞庭馬蹟數十山大壑星錯湖中葢信宿不能捨然未有專爲之志者近雅通張君創爲之余閱志及圖則鄉所見山水諸勝森森

然刻如再游焉夫游有三難曰地曰時曰力雖有探奇
意怪之土地隔遠則不得游地不隔時不值則不得游
有地與時力不能濟勝亦不得游名山無窮人跡有限
欲一一歷之豈有給哉顧志非獨爲游者設也游者按
志而尋易以足窮不游者披志而覽可以神遇蓋志者
據地形于片楮聚物色于毫端人之觀志足不履而着
到眸不接而若見故不登岱宗知有天門日觀不登太
華知有箭括車箱若然者得于志也孫興公慕天台之
奇遙爲之賦彼未嘗瞻赤城之標躡石梁之險也然能

抽思結句發聲金石者得于志與圖也故山川者地之
文也圖志者人之文也地之文極人力之巧所不能爲
然不得人之文不能遠著今夫碧巖至勝也以余爲湖
人至近也然而不嘗再登則游之難也志之成將使人
千萬里外見若几席此山之所待以遠著者也然造化
多秘安知是山之勝不有藏于深僻爲前人足目所不
到而志所未及載者乎其後有冥搜幽討繼茲而得者
又此志之所待也

天聖寺古檜閣碑記

鄭明選

郡城天聖寺舊有古檜堂按故記堂前有檜高大無枝
葉獨老幹槎枒如虬龍古色慘淡蓋唐宋時物云其後
堂廢僧如桂易而爲閣曰古檜閣乞余爲之記然求其
所謂檜者亡有矣夫檜柏葉松身會兩爲一其性耐寒
故其材視他木特堅然以今觀之終歸于盡苟歸于盡
與槲棘荆榛亡以擇則向所言老幹槎枒如虬如龍者
幻也綴玉爲樹玉非樹也剪綵爲花綵非花也特以其
似真也而競賞之然而實幻也非獨玉與綵雖本樹與
花皆幻猶此檜也且堂以檜名昔所爲堂者寧復有一

懷一楠存焉者乎彼其命匪班召欒人斲木石奮斤斧
 爲力非一手爲時非一日以有此堂也而不免于廢則
 向所爲堂者幻也古者五柞之宮桐柏之觀皆以木名
 計其功力當于萬此矣而不免于廢況此堂乎吾聞趙
 學士子昂嘗畫檜爲圖子昂畫名蓋天下世人得尺楮
 寸縑共寶之如懸黎結綠非不甚愛護也至今纔三百
 餘年耳而此畫不可見當其畫時澄神壹意仰而視俯
 而思心俾造物然後濡墨吮毫運若神鬼心非不苦也
 技非不聖也而不免于廢則雖畫亦幻也楫旣化爲朽

壤其槎枒虬龍之狀庶幾託于畫以傳亡窮而畫亦爲幻蓋天地之間自亡而有謂之造自有而亡謂之化此一定之曆也由斯以推諸有亡非幻者寧獨檜哉幻人之術爲魚龍爲猊狴爲虎豹狻猊吞刀吐火分解形骸有執以爲真則爲之迷人諸有之幻與此亡以擇而舉世迷之夫知幻之幻而不知諸有之幻此所謂識二五而不識十者也故由俗而觀亡物非真由道而觀亡物非幻道亦幻也若然今之閣與昔之堂亡異也今之記與昔之畫亡異也則我與僧如桂者皆幻人也知其幻

矣然且猶爲幻者阿難證心必辨空華富樓卽性先徵
日影以幻指人真覺乃見將令夫登斯閣者求所謂古
檜而不可得則思思則知檜之爲幻又知諸有之皆爲
幻諸有皆幻而有非幻者矣是閣也役興於萬曆某年
某月某日成于某年某月某日

游峴山記

鄭明選

郿城之南有峴山故名顯山逮唐避諱更名峴從其聲
相類也或曰山首見曰峴山云去郡不滿五里游者非
有齋糧備糗遠涉之苦突而夷無援簾捫葛之勞故人

特使之戊子仲春之望遲日載陽谷風和悅余乃與客
乘舟由江渚循月湖迤邐出郭門至于山之麓山前有
碧浪湖蓋餘不溪也水自天目南來二百里過釣魚山
匯而爲湖廣五里許滉漾澹蕩色如天碧湖之中有浮
玉山石硯磊陂陀上可坐數十人而望之如一拳歲卽
大浸其首特露若浮也由山左石磴攝衣而上至浮碧
亭則自伏虎巖至車蓋山中間峯巒雜出若飛若躍若
立若臥若趨若踞爭奇而角秀者出乎其後前則湖水
漣漪與日暎發而漁人賈客游士歌女揚帆鼓棹來往

乎其中湖之南涯有蘇灣宋學士蘇軾所嘗遊也其上
村居數十家桃李的的如錯錦焉自浮碧亭而上有巨
石巉巖拔土而出石有大竇唐左相李適之貯酒竇中
杯飲之曰窪尊因建亭曰窪尊亭云石之背有三賢祠
祠唐顏真卿宋王十朋蘇軾也三賢皆爲湖郡守有惠
遠故祠之而魯公嘗遊此山與賓客詩歌聯和至今存
焉自三賢祠而上有逸老堂湖山之勝大略如浮碧亭
然所見益曠矣逸老堂故鄉先生劉司空輩老而家居
以春秋結社賦詩命酒于此山今去纔五十餘年風流

文采猶有傳者而想見其人不可得慷慨呼酒酒數行
復起至于山之巔有滴翠軒萬竹千天綠陰如晦微風
相戛簌簌不絕而倉庚反舌鳴聲相應耳不暇聽矣已
而北顧城郭夕陽射乎睥睨炊烟晚起萬屋俱迷遂起
下山且行且歌復于山麓視其右有空明樓此余故讀
書處也因訪舊主僧雪剌盈頭矣爲數語殷勤道曩時
事不知其坐之久也少選明月東來清光半湖顧視僕
子取酒酒已竭僧爲出酒果復飲盡醉遂假宿焉至旦
日子起謂客曰襄陽有峴山吾郡亦有峴山襄陽獨以

羊叔子重此山游者無算矣獨顏李諸君子載在掌故
豈非以人哉顏李而後有逸老諸公逸老而後有我輩
千載之下寧復有知之者乎客亦爲之感嘆遂解纜而
返

游玲瓏山記

鄭明選

嘗覽吳興掌故集稱卞之陰有玲瓏山者略如錢塘南
屏靈隱之勝唐張有杜牧之皆題字石上鐫之余生有
山川之淫常思足跡遍五岳四鎮然而目不見境內名
山豈非闕哉庚子九月九日登高節也盍往觀之遂駕

舟出臨湖門抵于姚灣艤舟而陸約山行二里許與人
失道遇樵者引而前乃得至懸崖削成屹然壁立旁有
石洞沆泉出焉水碧色如染淙淙盤紆而下有青蛇綠
龜伏于洞口是東洞也復西行半里巨石陂陀砉焉迸
裂如劈長三四尋乍廣乍狹深不見底迫視之令人心
恐有股栗而汗出者復西行半里許有洞在亂石中天
雨則四水交注伏流山底至于東洞與泉水併出蓋其
山大抵多骨而下空如腹云于時日將暝遂下山徘徊
不忍去反顧者三其麓有村居前臨芳沼芙蓉夾兩岸

梁爛奪目野菊陸離香飄左右又一佳致也夫物之顯晦有時以是山之勝非不瑰瑋奇崛也然游士寥寥焉車騎不至亭榭不施草木蓊茸求張有杜牧所爲題石而不可得惟山翁野豎執斧斤而薪蒸焉何泯泯也今夫賢人君子懷珠韞玉爵祿不被于朝廷名譽不彰于當世者比比是也與此豈異哉故曰顯晦也貴賤勢也又何怪乎感而爲之記

游黑龍洞記

鄭明選

卞山之陽有黑龍洞者郡誌不載黑龍之義莫詳所由

又無搜奇鬻怪之士登陟吟眺于其間故其名不顯仲
夏肫之日積雨新霽余趣治簞飯罍酒速賓客往焉至
則道路荒蕪不治乃剪榛薙草辟涂而入見青石峻嶒
巧醜錯出珪者璧者羅刹者象鼻者牛首馬頰者虎豹
牙者列于洞之外其洞後庠前軒如夏屋之半寬可肆
數十筵非由斧鑿鬼劈而神鏤之其石都垂垂下懸如
綴上產石鐘乳潤白如蜃灰從者競采之其右隅一小
竇中黝然以黑又一洞也人莫敢入略窺之視外洞廣
倍之深不可測聞有翩翩振羽聲疑爲飛生也五湖之

中有林屋洞者誌稱有地道可通洞庭君山吾惡知夫
是洞者不猶林屋可旁達而遠到也今世亦無人徑林
屋而造君山者又惡知誌所云非張大誇詡之實無其
事也然則林屋與茲洞未知其孰雄而茲洞不顯林屋
之名聞天下彼誌能張其勝此誌所遺也故人非地不
顯地非人不顯夫苟地以人顯吾又惡知是洞者由今
以往其名不林屋如也賓客鼓掌大笑余乃舉觴三酹
洞口劇飲而後返

游自碧浪湖至月湖記

鄭明選

辛丑夏六月望余困于暑弟侯昌曰憊矣盍相與逃暑
于碧浪湖湖多水風遂爲我治罍酒以行客四人及我
子若孫從駕舟出城南門至于湖湖並峴山因登焉山
前後樹木穠郁綠潤逼人下臨湖水如熨顧瞻城中萬
屋鱗次煙靄交市復登舟駐于中流隱隱聞雷聲陰雲
四幕欲雨不雨乃有凱風自南來水紋如織簾披襟納
涼信不知有伏也日且暮還入城相傳賈耘老浮暉閣
與白蘋洲在其處皆湮沒不可識或云白蘋洲者今所
作官廩是其地也又行至月湖湖之上故有鷗波亭趙

子昂遺址也南由小橋入爲蓮花莊水色特綠芙蓉爛
開子昂別業所在也復駐舟中流水風颯颯如碧浪湖
其地夏月無蚊水宿者聚焉岸上下燈火錯映如星俄
而雲漸開完月朧朧且隱且見因舉觴酌月歌李太白
問月之詩漏三下乃歸蓋吳興最多水其近在城外者
碧浪湖爲大在城內者月湖爲大適兩游焉昔袁紹避
暑爲河朔之飲迄今傳其事其風流蘊藉不知如我輩
今日否因顧謂客曰樂乎客曰樂哉此游匪直避暑也
可以娛心目余曰殆有甚焉暑可畏也百欲之毒人如

焚如灼不啻暑也然而人爭趣之是自投火也人知逃暑而莫知逃于欲是之謂顛倒之民至人者恬淡無爲日游於清涼之府客躍然喜曰我輩入于火而不知逃也久矣悲乎哉余復顧子若孫曰小子識之逃暑不如逃欲之急也

游下菰城記

鄭明選

鄭子屏居橫山之陽時維暮春據胡牀瞻西山山之南麓樹木蓊鬱狀若屯雲隣老曰此春申君下菰城也去此不遠耳按史記楚王賜淮北十二縣與春申君春申

君以其地邊齊請以爲郡改封江東春申君因城故吳
墟以自爲都邑說者曰在姑蘇城內小城西北則此安
得有春申君故城乎然郡志實載之豈盡無據或蘇與
湖並有城不可知試往觀之遂駕舟而西三里許舟人
曰至矣鄭子病不能步以兩僕肩板輿行有土人前揖
醉矣語半蹇然猶能前爲導焉城四面累土周遭如山
其內松樹千章或偃如車蓋或攬擎如虬龍如夜叉山
風乍起聲如浙江之濤地僅千畝居人種麥油油如雲
尋至一亭曰長烟亭亭之下有桃數株花中開中謝游

蜂匪之往來相逋土人曰此外小城也其內有大城因復爲導委蛇而入至所謂大城者高山後擁兩旁築土爲平岡上與山接濶倍外城深三之然草木荒翳道路幾不可辨矣鄭子曰昔太史公觀春申君故城歎宮室之盛今無論蘇湖皆化丘墟矣夫孟嘗君信陵君平原君皆貴介公子其權力易以馮藉春申君以布衣起爲楚相食客三千人與三公子爭名豈不尤難矣哉當其西說秦罷兵歸楚太子北伐魯滅之蓋亦一時傑士焉假令懷忠挾信終事楚王身名永保矣而聽李園之說

欲以一婦人陰盜楚國竟乃不免故城彈丸之地且不能有何望有楚國乎凡物專之以爲已有者倏得倏失今夫仰而高山俯而清溪此吾與衆人所共樂也可以長有而不失乃歌薤門之歌歌罷洗爵三酌俄而白日西頽暝色覆地返而登舟比至家門星月在天矣

吳興沈氏重修族譜叙

沈微价

吾沈受姓之始自聃季入春秋文公三年初見於經其爵爲子其國介頓胡陳蔡間爲楚貢獻邑後析而入於蔡而楚亦有沈尹戌號一時良臣遭麇暴子姓散處江

左無定居漢氏標季烏程有諱瑜諱儀者黃中通理聞
人盛孝章函賞之典午渡江纓冕影接六朝中儒術文
采勲名碩隱之盛至與郎耶陽夏抗席稱右姓到於今
不衰晉大司馬諱徽者以族鉅派分爲宗祊計久遠昉
有譜圖唐太尉諱震再修之宋翰林學士夢溪翁又再
修之吾宗血脉歷禩不眩明興歲益縣齒日庶而此典
曠然未舉先司馬居恒深懷之會別歷南北數十年鞅
掌盡瘁弗皇也嘗語某曰夫飭行先乎懷祖懷祖隆乎
惇族惇族源乎明系吾以不德繆膺好爵當吾世而姓

牒罔聞繁流尚渙吾耻之今以遺汝汝小子其念之蓋
溫余懷者幾二十年而譜始成於是宋氏以來枝遙脉
續粲焉臚三君子之後不佞某復申之叙曰此先司馬
志也先司馬事也小子某何忍言某聞諸先司馬古先
王流行韋既醉之澤以尊一本樹維城侯蕃卿大夫多
化之議禮家持以爲繼別繼禰正姓庶姓繫弗別而綴
弗殊汰要獨嚴宗法至令支子不敢祭其祖輒近宗規
廢而倫始澆然小宗之法具在祖以推祖縣代若新故
或接其歿而不知其人卽知其人矣而不察其所居析

其所自一按之縱橫經緯之方冊而爲親爲從爲再從
以至袒免而外凡榮衰賢不肖歷如燭照不得欺此譜
之所繇重也吾沈散居江南北者著姓不一郡而尊氏
望皆曰吳興吳興云蓋肇渡江來文業輝映蟬聯豹變
真如經星靈耀列宿掩紈卽吾郡入漢舊姓凡有四而
以較吾宗率落落若夜向晨某讀譜甫輟卷而憬焉覺
且瞿焉太息也語云黃帝子二十五人其得姓者十四
人其同姓二人而已同德之難如是魏李彪亦云若取
門地魯三卿孰若四科是故人以譜聯譜以人重入

明而黼佩之彥縻國寵而訾家食烺烺乎銘績昆吾者
故不乏其人矣繼自今吾宗之英靈子姓有踵而起者
雖卜式以善牧拜郎孟佗以遺酒紆綬羨猶佛出望擬
仙登吾不以爲吾宗榮竇將軍獲仲山之鼎王中令藏
覆壁之書驚雀鮓之堆楹怪龍皮之漬扇吾不以爲吾
宗厚黃馬驪牛之雄辯折柱絕維之大力盛冠劍連車
騎郭翁伯則雒陽居閭樓君卿則元城上客吾不以爲
吾宗俠吾所爲後賢策者唯是端而言蠕而動強學待
問力行待取藉茅集木小物克勤幸而以一經効王家

竭其股肱夙夜撿家學以往無敢墜夷惠律之而不由
洛蜀招之而不入不爾亦誦詩讀書欵段下澤使鄉里
稱善人要_{不爲譜牒耻於焉而}父誨其子兄率其弟日
唯以經術行誼爲家承春秋伏臘謁祠展墓之餘埽堂
煖俎薦菹舉觴凡吾宗之爲親爲從爲再從爲祖免而
外者悉列坐論說本支之不可疎敦睦之不可後勃谿
構鬪之不可長善則相勵違則相塞難則相急昏冠大
故則相援興讓與仁是亦爲政斯不令吾宗虛軀江左
亦使三君子銓譜至意曠千秋無憾矣寧第以閭閻姻

姪驕語里間哉某感澆俗士競榮腴不開宗法故垂老述其所聞冀後賢共持之爲吾譜重無貽墮武之譙耳若譜例具倣夢溪翁所修不更載

喜留亭記

王穉登

吳興當具區之浸蒼弁羣山蜿蜒而負郭苕霅二溪交灌爭輸其產多蠶桑竹木魚稻果蔬之利故其俗號殷富然其人習水走陸負重歷險悍者業漁鹽事剽刦狡者工告訐善機械奸豪大俠操官府之柄而魚肉善類上之人惟務姑息以柔道行之故政寬民慢日甚一日

其勢不可復長矣筠塘陳公來守是郡知其不可卧而
理也乃略倣孔明治蜀之政務在徐暴去凶發奸擿伏
豪右兼併之家與舞文弄法之吏悉取而置之三尺大
者重辟其次遠戍其次髡鉗城旦郡有巨猾氣焰幾與
郭解等流毒滿境中人莫敢指歷前後數政皆漏網雖
柱後惠文名捕之弗得公獨破柱得之間閭之間莫不
沾酒相慶矣俗尤喜博博徒非勢家子卽市井僇民屢
禁之弗戢公每得一人立使反接游市中雖統袴子弟
法無赦甚者毀其廬號令一出期于必行不爲勢阻于

是五木樗蒲臬廬奪雉之輩靡不竄匿無敢嘗陳使君
法者深山窮谷黃髮龐眉之叟咸嘖嘖稱吳興自來無
此賢大夫也先後露章薦者旁午會公奏計當行鄉之
縉紳先生儒別豎褐扣當道門而呼曰柰何奪我仁君
乎枳其輪不得前於是撫中丞執法使者上其事謂刺
吏民所嚮也不留恐失丘民心詔報可公無行矣迨三
載績上將擢去民又擁道而呼當道復爲請政府以公
治行尤異露冕褰帷不足旌而使久在朱轡皂蓋間何
以儆勵有位稱陛下貴德尚賢之意乃乞列衙外臺仍

治郡事吳興之人喜色相告君子爲詞賦小人爲歌謠
颯颯乎井棠五袴之遺哉遂卜地于峴山寶生禪院之
上醕錢建亭顏曰喜留亭成而五馬來游四顧溪山堪
供吟嘯瞻文昌之閣青溪輦飛瞰潮音橫渚二橋長波
虹卧石塘如砥自東自南車騎可接軫而趨任負免褰
裳之涉皆公德政之餘也豈直民喜留公公亦喜爲州
廢留矣昔漢黃霸石奮之流皆以良二千石徵爲卿相
公循良不愧古人異時三孤八座何難致哉夫寇君在
漢河內借之而弗得陳公在今吳興留之而見從古今

之民有幸有不幸矣晉羊叔子蒞襄陽樹碑峴首過者
相向歔歔名爲墮淚茲山之名乃適相符後之人覩龜
龍而思陳公遺愛者涕淚豈減羊公片石乎剖符綰綬
之臣把一麾而守茲土者登斯亭寧不徘徊嘆息興高
山景行之思耶公諱幼學字志行梁谿人已丑科進士
如松和尚造法華山路募緣疏

王禪登

吳興法華山者寺名白鵝石吐青蓮尼總持遺迹猶存
松道人經營未畢雖則朱門碧殿奈無廣陌長衢負薪
樵者每趑趄乞食山僧空躑躅荒草坡難容駕象法王

安得常來黃泥阪不可鳴鸞宰官焉能屢至今將闢草
際委蛇之徑成人間廣牡之途或買地開林補短截長
取諸彼以與諸此或將田易路因高就下迂者直而窪
者平但赤手豈可告人非黃金不能布地比丘緣淺鐵
鞋踏破也無功檀越財多金穴打開俱是福燒磚鑿石
補就方成百衲衣擔水運沙聚來却似多寶塔試看負
者負荷者荷都在蓮華地上行咏而咏歌而歌盡來松
樹林中憇謹疏

答沈何山儀部書

袁宏道

蘇家使來讀仁兄手書知念弟之深弟支離可笑人也
如深山古樹根虬曲臃腫無益榱棟以爲器則不受繩
削以爲玩則不益觀欲取而置之別所則又痴重顏壘
非萬牛不能致而世之高人韻士愛其古朴以爲山房
一種清供輦而致之費之唯恐不奢累累有之仁兄或
者以弟爲山房玩乎則又何不尋一片清冷寬閒地苔
藓砌鎮日相對而必欲置之通邑大都使一人玩而
千人唾則仁兄亦何以自解乎雖然以一癡重無用之
物而致高人韻士之嗜爲幸多矣敢復僣塞不聽驅置

邪弟行矣

遊峴山記

謝肇淛

吳興山至多獨峴山蟠郡南而近下據碧浪湖游客蓋肩相摩云歲乙未冬十月徐興公自閩至訪先有約訂余必吸盡五湖烟水乃去余謂千里之行自足下始請以峴山爲期適余幼弟殤弗果無何顧長卿世卿從吳江來乃以望日發尺一召客戒舟於涖漱有於麓主人肩輿先至問老僧興廢事僧跼進葺寺疏余領之已而山下屐聲甚厲則客至矣於時碧梧隕霜鴈影南嚮西

風吹浪高濺寒衣各有寒色携手入滴翠軒展圖書共
閱余出古陶觴客已與興公劇談鄉曲里語顧氏二仲
弗解也相視大笑徙倚憑欄望遠近雲樹翠色可餐而
丹楓錯落右則車蓋危峰岌岌欲隳左則平湖千頃茅
屋萬家映帶林薄主客欣然賞心蓋不蒲萄而醉矣久
之視日且淹茲則連臂下山經逸老堂堂圯四壁立又
下爲李相窪罇石興公笑謂此蹄涔也者將客牛其飲
哉余曰碧湖可供一吸何必鑿破山骨也茶亭俱廢折
入寺寺亦廢藜芒刺客客不可坐遙聞江聲隱隱月如

聞自浪中翻矣亟登舟趨浮玉水及山腰浮圖石級已
斷長卿賈勇先登衆從之月去人不數尺金光一道入
水水紋如沸而漁舟橫笛兩兩歸來世卿大叫以爲奇
余顧指西山落照謂客此紫綠萬態不減金波何諸君
冷煖乃爾語有間露入秋衣客寒益甚始歸舟漾之中
流從其所止而之焉比入城漏下四刻矣各別去越二
日長卿爲圖寄余且謂余記是游嗚呼余安能記之自
有宇宙便有此山昔之名賢不愛杖履當其摩崖探壑
蓋妄意以託於千秋曾河之未及清而名骨俱朽矣余

自李湖以來屢不知其幾穿三載之間俛仰已爲陳迹
况乎一官如傳蹤跡若萍繼此而游能復幾何而余又
安得而常有之乎雖然余惧夫湮沒不稱而山靈以是
浪游者非夫也泚筆爲記不能不更爲之墮泪

募修歸雲菴疏

謝肇淛

嘗聞二宗顯化而頓悟爲難六度焚修而布施居一蓋
慈悲喜捨本自出乎恒心而功德因緣亦稍通於世法
雖云福田利益吾輩不言至如陳迹廢興路人知感歸
雲菴者道場之別麓游覽之勝區孫太初卜其旁而築

室意遂鹿門之耕鄭繼之題其堂曰挂瓢義取箕山之
隱避世終期出世逃名亦附逃禪但從孫山人袞謝以
來日就頽圯慨自鄭吏部作興而後久屬荒蕪駟鶴統
空廊轉使猿驚鶴怨慈雲歸薄暮祇聞牧唱樵歌不穀
署據清茗身爲小草勞形案牘深慚說法宰官吊古烟
霞頗憶棲真隱士卽使檐帷楚駐敢云比謝傳東山若
今泉石增輝亦足表吳興南鎮顧窻牖間雖羅翠岫而
衙齋內僅有白雲登科官糧乍可養支公之鶴鐺銖月
俸何以布給孤之園茲因本寺比丘普告十方善信或

睹高士荒阡而挂劍興感或憫瞿曇朽像而捨髮發心
松栢摧爲薪浪說中郎有女菩提本無樹須從上智種
根毋深排二氏而立町畦應不住六塵而生布施儻香
燈潔淨亦可資公暇之游郎山水清奇未必非斯文之
益母曰事不切於簿書終同故紙言不關於象魏竟屬
蕪詞云爾

題韓求仲四書選文全編

湯賓尹

求仲氏居若上間無所事事發故篋得所藏制舉文自
洪永以來者悉刪且評以課其子將以公諸天下爲人

子弟之有事于斯者而先以觀宣城宣城咈曰天下盡
諷吾與子文而盡圖吾與子登身之具借爲反報子猶
不自懲戒欲相導耶求仲曰固也百相反也百相圖也
吾與夫子之牘在下上三百間諸作者具在異世之下
吾與子在耶圖吾與子者在耶或問于宣城曰昔者子
之于桓也曰生予德于匡也曰文在茲于所以生所以
在也皆仰而呼天捨天無一足自馮與宣城曰是固所
謂知天命也德者一人之私也天實私之不可得而如
何也文者天下萬世之公也天實公之不可得而如何

也聖人直以德私諸其身以文垂諸天下後世也與哉
左崇侯虎右費仲惡來不能一日安其身于西伯者文
王之天也朝有三家野有少正卯不能一日安其身于
東魯者孔子之天也後先文王者君則君相則相皆得
獨行其志不得行其志而托之乎父作子述有憂患者
信乎無憂者信乎不得行其志而托之述而不作有意
于擬周公不復夢見無意于擬文王僅竊聞知孔子於
此蓋自傷也曰吾五十而知天命矣道之不行已知之
矣退與二三子商美里之業旁及詩書禮樂之緒天其

許我乎前此之周流轍環汲汲皇皇適亦未爲知天命也知天命則可以順于耳從于心而無逆于世故三都之墮兩觀之誅聖人間用人道用人所以回天鳳之歎麟之泣雅頌之正狂簡之裁聖人純用天道用天將以開人然則何以謂之文也曰文者神明之用也道有行不行而神明無所不徹徹于上曰天文日月星辰風雲露雷之屬皆是也徹于下曰地文山川草木飛潛牝牡之屬皆是也徹于天壤之間曰人文詩書以載之禮樂以潤之神聖之典謨生儒之課業皆是也然則何以卜

其所在曰一代之風會必一人焉繫屬之奉一人于上
匠太平還一人于下振聾瞽代筆代舌紛于兩涘衰能
興之晦能明之必茲人焉獨也問者曰文之用大矣寸
之管尺之牘以今科目之媒爭古謨誥之烈可乎應之
曰所謂經者亦通行文告而已途謠巷詬而已小夫偶
至之語流染不歇縣帝制以爲的群天下之英雄豪傑
畢精力以攻之而有不傳者哉素王刪述之後楚傳騷
漢魏傳古唐傳律宋傳道學元傳曲我明必傳制舉文
一代之精神畢聚于斯自斯以外力皆用半而不暇用

全未有能精遠者也問者曰今之時文可以汗牛矧歷
朝十餘歷年三百遇者與不遇而皆有事于斯者不可
數計安所盡得美好者而搜錄之應之曰選聲者天下
之聲不勝收也接于吾耳而已矣選色者天下之色不
勝收也接于吾目而已矣問者曰文可以盡人乎應之
曰可以盡人而不可以盡人人之符采發于面語言脫
于竅精而出之致其血氣以相從合于脈面之光澤猶
可塗也竅之節出入可以自按脈之微眇無所容吾力
而壽夭貴賤之數畢動於呼吸之間故曰可以盡人發

于面天倪之所符也脫手口天機之所洩也精而出之
致其血氣以相從揣摩愈工而愈不可方物極君子之
所至與小人之所至各有餘精故曰可以盡人而不可
以盡人雖然吾操其至者而百道之馳驟自不能越古
今人之相遇有一結軫對面者哉他日謂求仲曰男兒
稿則稿矣不借聲譽于人間子一人一人自足我兩人
兩人自足孤行無苦求仲之文選行所列姓字不寡矣
使斯文一道幸而大明斯人之徒亦云太盛吾虞子之
身爲植而毋虞孤也

太僕卿懷恩韓老先生偕沈淑人八十壽序

黃汝亨

今上御極三十八年吾友韓求仲氏以貢舉第一人

陞見上嘉其對首賜及第是時求仲尊人太僕先生

春秋七十有五而沈淑人亦康寧偕老一旦視其子起

書生登館閣之選名動天下賀者曰先生休哉旣于五

福略備矣而卿尹以爲爵求仲以爲子五福之外衛加

以兩一時朝紳國老下及巖穴耆艾之士無不望先生

如神仙中人也越五年而先生與淑人俱八十新安汪

子孟樣以求仲夙有交于子乞鄮文爲壽予曰子知韓先生之克有求仲者乎汪子曰生也晚不盡知也抑聞之福生有基禍生有胎象事知器占事知來昔梁統爲東漢名臣獨以增重法律一語天報之尤慘先生歷官三十年未嘗杖下斃人作令寧德申免陷滄糧二千石備兵府江關山通道四百里隄防江漢捕釋掠賈子女數百口吾聞之活千人子孫有封先生之德如是其以此哉予曰唯唯否否先生給事三垣未嘗言一事輕論一人寧以不稱職外轉果若所云自霆擊風發者觀

之幾失諫諍體不知翹君以沽名許人以賣直錚錚皎皎以相角勝如一閭之市固君子所甚惡道家所深忌也先生知白守黑無近名譽寶善嗇用同符黃老沃本而深源慶餘而流遠固宜永錫難老旣備五福而衡加求仲以爲之子也然求仲挺才績學遭逢聖明簡拔之奇出自天眷卒不免垂翼以歸論者疑求仲之心必有鬱然不樂者予竊以爲不然求仲兩尊人年已八十矣縱使廷臣推轂甚力天子津津鄉用披心而前膝晝日三接一歲九遷吾意爲求仲者懷我二人亦必抗

表陳情或自劾歸養其不以槐棘之榮易桑榆之暮不待智者而後知也且功名出處之際多不可以眉睫致論昔解公縉以抗直坐深文罪不測高皇召對便殿慰而遣之曰汝歸且讀書十年著述冠帶來庭後卒叅贊機務內閣之名自此始今天子雖放免求仲安知解公高皇帝之所以教解公者乎天下之書無盡卽聰明問學之人亦未必讀也今海內實多事國家安危之計搖搖未定求仲年尚壯靜貯而厚發又安知不有伊呂之略出解公上者乎雖然人情每不自足旣見其子

登玉堂旋願其子開黃閣作黑頭宰輔則二老人之私
容有或然者求仲其以我言進使先生顧瞻八十年之
內優優百祿亦可謂極備靡闕而茲復邀恩君上暫免
朝叅以曲盡天倫之樂今日移忠而孝他日移孝而忠
大知勝小知大年勝小年則尤足爲先生壽者也汪子
于是喜予說而筆載之去

策衡序

黃汝亨

策之雄者亡過於戰國之士與三國之人才然皆偶機
觸辨以權智相傾軋已耳而不爲組織之篇在漢粹醇

若天人英通若治安沈簡若趙營平刻覈若晁大夫輦
陳篇矣然各就一代之變一人之才一事之則而極其
用其出有本源學有積貯因人際事展用而乘其時又
彼問此對響答象設以事成文而非以文摭事故爛焉
足述也 明興制科得人最盛而終之以策直欲網羅
千古苞孕衆智綜錯萬變而又先之以經義爲排偶章
句之文書生執理卽遺事聘辭卽迷務喜倜儻非常卽
卑鄙學究一人之身耳而舉天下治安屯田實塞古人
之所分長而以寸晷尺幅兼擅之其學必無本而其言

論必不可施於用亡怪也一人之筆而可以羅千古
苞衆智與億萬之變庶幾可施於用者亡如主司之自
爲程策而冠諸錄者何者其所對之人卽所問之人非
其有本而多貯爲生平之所得力而勝乎物其言不出
也故言成文章施於當世亦成寔用如弘治山東之澤
道德而藹仁義至矣其次如新鄭乙丑之深江陵辛未
之悍瑯琊湖廣之淹雅雲杜陝西之英奇允寧蕭孔之
篇公望騷雅之作他名公鉅人靈珠隋璧雲蒸霞變不
可勝紀要皆傑識匡時宏文托志書生之所窘俗吏之

所疵腐儒之所拘叅伍以變會通其觀古可以適於今
今可以程乎古儀秦失其辨司馬諸葛失其智皇王之
略天文地理人事之紀俱在焉嗚呼此策衡之不可不
讀也孝若夙有妙才文弱登壇乃其志略在當世黥然
未究於用而露一斑之識衡鑒茲編領袖末學良亦遠
矣雖然子孟無術亦足以辦事而馬服君之子以父書
敗夏狐裘越章甫推舟於陸而用與時不相當智有所
詘策有所不及則存乎神明之力勿謂中郎帳中之秘
勝人也

高士吳允兆先生傳

黃汝亨

先生諱夢暘字允兆歸安人也海內以字行稱允兆先生父曰應徵閩藩幕贈兵部員外郎大父曰龍爲零陵令贈公有五子伯仕讓仲仕誠叔仕詮南兵部郎又次仕諒允兆其季也生而慧絕篤摯孝友不屑爲諸生攻詩古文雄長詞壇而高節好義抱經世之略當世莫能窺也童年侍大父輒得其歡心十歲贈公歿哀毀逾成人母爲析業與昆弟推讓已大父歿哀痛如喪父爲諸生與仲俱嗜古有文名試輒冠脩偶而郡丞某嘗徵仲

文不應銜之會叔氏仕諒與人訟其人病死其家遂誣叔殺人而知丞故憾仲辭連仲丞下令捕仲急允兆以計緩仲遂赴南雍試丞恚甚計收其孥必歸遣捕數人倅至母大驚允兆聞而踉蹌赴母所大呼曰殺人者我也吾死耳無與仲柰何嚇吾母叱諸捕者挺身出入見丞會丞以它事與諸生鬪始釋仲竟以憤死又三年事已已走都下冀得豎尺寸慰母歲餘無所遇會兵部公舉進士欣然曰是稍慰吾母遂歸歸卽弃去經生業攻古文嘯歌不輟而壹意孝養母母所居輒與俱母春秋

益高飲食寢處不須吏去左右如是者終母世母歿哀
毀特甚服闋四方譚藝者日踵至而允兆不自得浩然
歎曰奈何令後世嗤我爲無用詞人哉向所以甘尸牖
下者母在也于是復挾策抵燕因得宋忠甫西寧張聖
標金吾李將軍某與定交而忠甫故侯裔好任俠使酒
自交允兆卽折節讀書會李酋亂寧夏卽慷慨上書願
得當一旅振先世功時論壯之于是海內賢豪長者爭
交驥允兆先生而撫薊鎮益齋成公爲虛左奉教允兆
爲言今西北戰士苦無餉東南苦轉餉不給爲畫瓌田

十議成公欣然將藉手疏聞會遷去不果時蘭陰相公亦習知允兆願借箸畫國事語多不傳如奏罷關市開採中使者數輩其著者也倭寇朝鮮侵其地朝鮮急詣闕下請兵而客有倡和議媚倭與約婚姻者兆奮然起曰誰爲此辱國之言因與蘭陰言朝鮮吾屬國義當援與倭可擊狀聞者氣奪上遣李大將軍督兵趨平壤復所侵地倭遁去久之蘭陰公求去位允兆言上遇公厚不以此時竭忠報國家而輕言去不用而去未晚數爲公具疏將上數爲嘔公者所阻允兆方就食遂推

案起謾罵曰甚矣倭人殆趨出蘭陰公爲涕泣持允兆
袖曰先生且留吾徐圖之允兆曰公去朝廷難吾去公
易耳遂拂衣歸亡何聞宋忠甫死嗣未立復抵燕經紀
其後事故所交游或死或去皆雕落乃長歌別聖標從
都門走五臺過大梁泝河洛還登普陀禮大士而歸與
二三故交抵掌談生平諸鄉老推入社爲詩酒高會與
天下高僧寃無生之旨郡大夫有慕允兆名者願得二
見聞緒論會均田議起又病荒議賑允兆悉心條列十
餘款上郡大夫輒拜受教顧卒不與見也性孝友老而

彌篤諸仲叔亡者撫其孤子若孫不啻已出急人之急
憂人之憂無疏戚貴賤輒罄力應之讀書覽大指不汎
濫文藻詩從心出有骨幹大都追古而卑今也臨殂如
就睡不亂得年若干遭文若干卷行于世嗟乎如允兆
者可復作耶允兆孝友類姜肱義類魯連詩類高岑言
論風旨類林宗不盡用而實有用於世如允兆者可復
作耶

寓生曰世卽知允兆以爲詞人意氣人隱人耳吾嘗聞
其與猶子偉論於陵仲子與管夷吾孰賢偉高於陵言

其能辭三公爲人灌園允光曰非也戰國可以無於陵
春秋不可以無夷吾夫隱亦何難之有嗚呼此可以窺
允光矣余故推之曰高士令尚論者稽焉

棠亭園記

吳文企

吾於東西浙再來人也行山陰道已飽應接之奇來若
雪間又極登臨之勝向青山綠水中作二千石大有清
綠加以歲豐人樂吏久民信在公多暇日焉然溪邊蔭
美丹子云勞郭外峰青儻人不易吾所甘人所苦孰與
咫尺園城之內烟月萬家之景無煩雙屐坐攬千峰登

平臺而岩視俯流沚以川觀水自清漪綴之以版橋人
跡林本翳業收之以曲磴精欄爲者不勞取之無禁何
必彭澤仰公田之酒成都樹八百之葉然後公私取給
進退晏如者哉園以萬曆乙卯新秋作不列垣以城爲
垣不鑿池以河爲池逍遙者其堂鶴鶴者其亭樂渡者
其梁語載各小記中在唐中葉陸鴻漸亦竟陵人流寓
此中自號葉亭翁翁與吾生同里游同地山水同情吾
園翁園也作葉亭園記

玉筍帖跋

吳文企

清士處官下雖木枕亦不宜作其嚴乎我來守吳興且
作木枕事無之偶郡齋古茂樹下披草得吳石金鐵質
遠山色紋背首趾悉如琴瑟狀北宋物也上題玉筍二
字自元豐宣和歷勝國本朝高人題字已滿幾年穢跡
豐茸不爲井闕階砌幸矣自笑處官百不如人落落磴
礧如此石石應太守將去先櫪裝題各一部豈曰廉石
公然貪墨矣此語未易舉似它人固當使韓求老知請
求老下一跋語

附跋語

韓敬

玉筍伏吳興郡齋後自元豐宣和到今堅得草莽中
凡五百餘年遇白雪守君石始能言耳昔虞愿爲晉
平太守有越王石常隱雲霧中清齋守乃得見惟虞
愿見之今玉筍亦具具眼者耶守君清虛無事退食
日朝石曰我恨牛奇章聚石爲族以甲乙昂第君南
宅老子以袍笏辱君吾則否否請獨以貧太守對異
日歸舟壓載惟石丈人日日坐我香雨樓也石曰可
增定玉壺冰序

吳夢賜

觀熙明之容巢許始信待客之不可招本穢濁而遊僅

佞益知愚者之不可覺凡其有待疇則無情將取退然
以希太上則陳言可采餘韻若存企此同人稽諸曠代
云爾昔吳郡都玄敬先生特揚高尚亦槩方聞用索纒
紉廼勤鉛槧嘗輯書曰玉壺冰蓋志潔也頃吾郡閔康
侯氏好而廣之由漢華以降明興以前事必窮搜言
惟殫述務使針砭弊俗開滌塵襟因襲前題以風火宅
在玄敬且躍且潛可誼可寂興懷綺歲竣役頽齡齡登
所由來安知無託乃康侯珠非售櫝刃方發礪遽厭高
華直耽恬漠他無嗜焉猶足多者逮書成而問序於余

余惟世運厄於當塗士習變於典午王風既泯大塊莫
容掉臂起紛逸口媒禍移其憤激寓之玄虛將寫形神
皇恤名檢杯中枕上斯愜沉冥杖底毫端儘寬放浪陶
柴桑所關不細卒號無懷阮步兵所指甚微繼云至慎
無慙隱德任蕭蕭乎東朝爲屈清芬存典刑於草澤緣
寡營以造真境由好默而領微言人所呼爲癖絕彼左
遂其泊如身旣違時事胡謀野不聞理亂已悟盈虛開
眼蒼天忘言芳草烟雲戶牖魚鳥朋遊快今古之如期
指河山之常在喻醯雞其何有踐芻狗於旣陳其斯賞

契無絃途遵合轍遺區中之累而證言外之詮者非耶
若夫畏影含陰避跡忘息陽爲高蹈寔侈競心處雕峻
而圖莊矜官閥以師鄭仰天台者終鄙赴廬阜者必麾
遁則惡用買山出則皆云誓墓於無事求多事強俗情
爲勝情藏名而較詘伸去勢而操予奪高巖穴以廣交
道借風月以美談資五千言之執於無九百種之破其
有大抵巧爲理累僞則神馳如彼賢豪猶嚴真厲沿之
叔季安免溷淆乎哉余則謂書不限代代不限人旨固
淵渟類仍林列隨其興致所及恍乎精神與俱姑以兩

君子之好處前人亦以兩君子之好俟來者而已然聞
之吉光不濡火浣不熱物莫可移人其胡染何入不得
何止不流樂木中來境寧外假噫騷然真氣邈矣至人
孰幾於全則語其次

香圓圖贊

爲問康
炭作

吳夢腸

林實是珍用驅醲郁譬之得朋居然比玉炎散瑤光秋
垂結綠猶蒸栗然飽霜已熟匪規而圓不風而馥傲然
晚榮奚遜甘谷江陵洞庭將無婦育老雪圖之契爾幽
獨願借餘馨聊寓余目

昔東坡居士晚年呼侍姬朝雲爲老雲余亦戲呼雪
居先生爲老雪吾友地下聞之能不我嗔定爲絕倒

木竹杖銘爲心厂長老賦

吳夢暘

竹恒虛爾能實木恒曲爾能直疇爲離疇爲壹離其章
壹其質道無常道無息日行之恐不及爾爲侍者司其
職窮秀才惱不律嬾和尚嗤杖錫唯於爾乎胥一擲

答閔康侯書

吳夢暘

不佞暘趨古未至從時未能四顧孑然老益自廢幸自
附於不鳴不躍者流尋將匿深山以待盡而已迺不意

晚而遇足下過聽而收之于雖一承顧盼驚下可前
終恐小人懷璧實出非分皇恐皇恐至聞揚摧旆林靡
不中的諷詠浹旬口有餘味其間評騭緊非不佞所敢
詳然足下成我大矣能無一語讎也竊惟當代文章開
創之功莫大於北地顧後賢短之以爲時屬草昧人文
未炤而北地所自命亦以爲未躋自然之化境猶之乎
文人學子之韻言已耳嗚呼是唯北地之不欺是唯北
地能道之而卒莫有出其右者譬之江河地中或淤或
顯其源遠矣同志者盍溯而委之壑斯稱衆流合源今

古旦暮耳廼今百年以來風氣日降將謂張今愈盛愈衰將謂復古益近益遠毀則相傾譽則交市淫哇塞耳雅音日微嗟嗟風之不競寧獨文乎哉蓋古之導今皆今之不可無導以源也今之襲古皆古之不必有襲以流也雖然有能襲之猶得古之衰苟溯其源固有可合者在至如潦水暴溢徒使耳視者駭愕將恐不崇朝而涸是可與有源之水等觀耶詩云唯其有之是以似之今之不古若者以其無有也是不在文矣是不在文矣足下才甚高志甚卓春秋甚富由此諸古何古之不可

請而暇較今人爲哉願足下勗之矣然不佞誕矣僭矣
所謂伸於知已然耳其唯足下終教之

懷愚韓公暨沈淑人八十雙壽序

伐沈方伯

米雲卿

寓公

大夫韓公蓋八十而耳聰目明又夫婦偕也次公以會
試第一人奉大對哀然舉首撒簪筆請休沐就乎舍
實稱觴焉爲吾湖盛事同郡謀所以壽公徵文于予且
徵事焉余惟公雅善擘畫趣取乎利民因而調劑之動
中竊會不務皎皎爲名高故所至有治理効旣去而民

思之乃其績最鉅莫如府江開道一事功德宏遠矣可
以世西粵在輿圖爲十五分之一架阻遐邇禹功之所
不及有虞氏巡狩止于蒼梧之野蒼梧以南未嘗有聖
人轍跡豈其以遐荒棄之有所未遑也公備兵府江距
省四百里而遙地廣多山菁木叢密蛇蟲之毒蒸爲瘴
癘徃徃持弩矢窟穴其中伏路行劫曾無寧歲公移檄
廣韶二府募商五十人人挾五百斧手隨山刊木誅鋤
蓊鬱由是蛇虺熊虎不得復傷民崖洞清盜無所蔽匿
相道里遠近置亭館行旅無戒心徃府江之水不可飲

且清其毒於下流至是無惡草木以醞釀千里之江滌
成佳汲視昔非具兵不得行非載水不得食走生人機
办之中利害懸矣此方民推公功在禹益間以開創土
宇羣生永賴非攻城拓地所能並也今公得享上壽開
世祿次君既取上第脩負禁近乃復遯其遠大之思爲
他日樹立諸孫美秀而文公暨厥媼皓首頽顏翺躑若
神天之報施善人豈爽哉客曰論則是矣韓公黜猷詎
止此聞其始宰寧德調停本折間谿陷海虛糧二千石
而軍民兩利潁川之治也按兵不舉一鼓而擒韋王七

救寧數載澈海之畧也却羨餘萬七千兩而不自居廉
歸略賣婦數百姦盜屏息而不自居功斯亦不足舉乎
余曰史遷作傳人識其大韓公長者行與道長義與歲
積敷歷中外炎風朔雪皆有車轍馬跡焉懿媿不勝書
姑舉其大者當西粵襟喉若鯁也地且爲狐鼠設險自
漢迄茲乘傳而往者亦寧甌脫視之顧費無從出慮用
於國者不貲冠或相撓且將徵兵已更爲難首或以去
中朝耳目遠事成無赫赫名不成爲無窮之累寧遷
延苟歲月公志在利生於赫赫之名非所尚且計無敢

旁庠惟此時爲然固已小鮮視之事可利商資用當辦
諸商從而二十征一兼以利國至商民大集以兵法什
伍之堅楯大斧陽以攫獸陰以禦盜彼術在避實邀虛
必不敢犯吾整皆公方略也利吾商者卽嚮爲吾難之
輩木灌輸以給公費者卽嚮伏弩發矢擇人而食之徒
僮囑昔襟喉之疾去歲省艦兵餉萬金彼方之民方且
尸祝而詠歌之勒其功於金石此方不知也惟公所樹
若此而人有不知所以爲德也語云活千人子孫有封
舉輿圖周數萬里從古未開闢之土結駟連騎儼然中

州近古之良吏尚不得與列矧其亞者乎公自出諫垣
遂迢迢藩臬不復升朝者以不務聲華故也公蓋耶
知希我貴旣貴矣胡不樂若于公有陰德高其門旣徵
矣胡不樂居官建從古所缺之功旣成矣胡不樂舉公
三樂以侑公觴固當滿引也公聞若言輟然曰子無乃
稱遂書爲序

先王父起家縣令歷兩邑名在西漢間比晉薇垣多
所諫列都削草不存秉臬粵西異績彌著功銘金石
澤浹人心誌紀載之榮爲懿業惟是墓上片石尚懸

以有待故其詳未得而譜焉郭青螺先生與王父年
友稱薦契黃寓庸先生與仲父交最深米君夢寓公
則千秋昌箕物外友也故斯觴壽諸篇雅在常均之
外嗣振前休責良在後人矣不孝孫千秋百拜謹識
雲卿字君夢金華人鶴歸安之埭頭有詩集行世萬
曆乙卯間沈何山司寇時正屏藩八閩

火蓮偈

為韓延年內人沈說
延年即聖開舊字

米雲卿

夫洪鐘緊叩响徧虛空悲念猛求端徵物象式觀金奏
有無之體自分忽兆華形自他之造奚辨豈鏗然寥廓

者則本于葦爾堅凝煥若卅綵者不由于寸衷悲感耶
凡有聰明述相聞見咸謂鐘响之理不類于火蓮躡化
之祥無關於心念也是皆淺判都未深推詎知鐘性擊
心竝周沙界冥應寂感不離毫芒他性實而我性孚故
谷呼響應我法誠而他法著猶表立景隨金舉今鑄空
音之相生例悲念火蓮之默召則知有無二法皆出于
自心空色兩端不離于元性至迷情一起物我形分故
于一切法中自立他附大千界內果後因前妄有感通
自分體用然不可認物之非我造必由他也菩薩于三

摩地中建立國土則萬物皆造于一心如來于大願海中廣化蓮臺而九品皆隨其願力當觀心未發之前曾無一物願力一弘之後頓現千華此其證也嘗聞華嚴火蓮顯異表菩薩之勸心同分水蓮吐芬亦世善之常供我延年既享其常復承其異固當自慶也余更有說焉竊聞受善言而終違之淑將成悔感異應而後怠之福或爲愆可不卽入華嚴海中求度耶故說斯偈以相勉云佛言世間法一切惟心造衆生信不及妄認水生蓮蓮必由水生火蓮復何義水火二法體妄有法中生

妄集世界成充盈善惡衆浮遊與漂溺樂場及遭焚水
火性自如業果紛成異同修善業者同甌水中蓮善業
或少虧對之不成悅蓮花逞香色聞見屬因緣窒鼻盲
眼人當面猶千里須知一物享全藉宿因承水蓮年復
年供彼恒沙衆延年心猛銳一懺感真如應異由感忱
宜脣火蓮瑞三華三目現若表去來今見在華宛然當
辨誰爲造如云慈氏造慈普豈偏開若謂火能蓮何獨
君鑪有君今當自信瑞自自心生朶朶似凝脂莖莖抽
烈焰苟非心猛利竒端不能成譬之飲水人冷煖皆心

覺前心若如此火蓮應早開後心能不違蓮界何難至
見心當此瑞已似谷中呼衆善不能齊隨君心所到徐
徐爲善者卽取水蓮心火烈水緩柔勝劣從斯判余爲
火蓮偈兼舉水蓮言並啓一心門無竒不可造造至無
所造所造亦皆空妙湛不可名是名爲佛道

福山禪院放生池募建佛閣疏

蔡善繼

按郡志我湖放生池不下數十所迄今湮沒無聞將高
岸爲谷閭殫爲河抑豪貴強有力者因之以爲利遂令
清泠之淵化爲沸湯功德水變爲苦海胡古今人不相

及一至是也福山禪院石機師倡道東南土盟蓮社我
湖薦紳先生孝廉文學善信共發大心倣效顏魯公遺
囑剝立放生池於城西之草蕩漾池周遭數十畝大小
相錯山水盤旋堤防堅固網罟莫加每季蓮社課畢師
卽偕諸檀越說法放生人多濠上之情魚脫釜中之苦
神龜不必見夢於元君大士不必覲形於蚌蛤悠然而
逝陶然樂也約言斯舉利益有六施法平等損一錢與
萬錢放一命與萬命無多寡一也人得隨力隨緣破慳
吝心利一人旣已入會見斯勝事出而放生歸而食肉

弗忍也無何而六齋無何而斷殺遂至永離惡習利二
隨喜放生者歡喜讚歎未入會者因而入會利三此風
一倡遠近善信感動興起續置放生池者十餘人利四
素網捕爲業者始潛入爲奸後忽感化相戒勿犯後盜
業消善心增長利五始放止水族魚鰕既引中觸頻遂
惠及於鳥獸利六似此功德不可殫述乃諸君子開其
始復慮其終以郡志所載放生池數十處而今蔑如也
不及此爲久遠計那能不踵前轍旋隨湮沒乎於是議
復建佛閣禪室以安僧衆令游泳斯池者時聞妙法共

證無生且令數十世而後發菩提心者皆得有所憑依
感動如我輩之於顏魯公則薪盡火傳利益更無窮也

題閔康侯草堂咫尺園吟咏序

葉秉敬

天地間一種氣機大至於衝天拂地撼山震海而小至
於鑽芒度隙破萼搖莖使萬物飛動而不自覺者其名
爲風風者天地之逸氣也人心如天地亦有一種氣機
始於神思輪運流於齒頰毫楮合於絲竹管匏而鑽於
皮毛肺腑使人情飛動而不自覺者其名爲詩詩者人
心之逸氣也此種逸氣名之爲詩可名之爲風亦可詩

三百篇皆風也而別有雅頌之名雅與頌皆可以風天下者也皆可以風天下則皆風也此風噓於漢魏則爲漢魏詩噓於唐則爲唐詩噓於宋則爲宋詩詩以風名亦必須有風之氣風之意不知其何自出以爲出於土囊者非也使土囊可以出風則土囊未嘗一日閉又何有無風時耶信知風者一氣機之自爲激動而非有所從出明矣而作詩者不出於漢魏則出於盛唐汲汲然惟恐人不知其所自出夫取詩于漢魏盛唐亦似取風於土囊者是不若取風於心心之變化無窮其風之出

亦自無窮而何必借風于異代以異代之陳風而爲今日之新風其風殊無變化是繫縛其風也風可縛耶閔君康侯于予未嘗一面而愛予之文特甚片紙隻字必拾而珍之至煩剗剗抑何偏也往予與閔昭余公同在冬官時得康侯手書并得湯錄諸刻而讀之予亦輒賞心而不自已茲復得其草堂賡詠與其咫閣吟而反覆諷誦若有一種清風不知何自而來噫是可以爲風矣予因是以窺康侯之所以醉心我者其意亦在於予之能爲風而不能受縛斯吾兩人相知之意乎抑康侯旣

能爲風因以其餘風溢而爲諸文再溢而爲經義皆無
不可而或者謂康侯憇草堂築咫園寄心於塵外而不
能屈首於人間是又以其風而還自縛也予知康侯必
能廣其風爲君子之風以偃天下之草而與二南並盛
予不佞竊願坐其春風中

與沈泰垣督學書

王衡

弟自附驥以來十五年間浮沉驚憂疾苦中齒舌都敝
皮骨僅存此番暴禿筆赴公車糠粃再前真出意外望
外弟因悟世間得失毀譽倚伏若環向惟叨冒小過以

致紛紛今見償又過之天意人情不知何以處我托在
骨肉自當爲我分懼而獎借滿紙殊非所望於知己也
當今文體怪謬釐正紛紛百無一効愚謂其根不在文
體而在邪說其權不在主司而在督學今海內文運莫
盛八閩時下且有巨子爲之倡而適值老年丈以青天
白日之胃襟秉司文鐸此真千古一時翁所惓惓屬望
非直九方之相馬匠石之取材而已伏惟傑然建立以
迎倒瀾將粗糲腐儒亦有榮籍焉

擬進

神宗皇帝保泰箴

姚祚端

維 皇上御極三十五年德輝遐蔭禎應駢臻威被
禬于域中禧祉集于闕下星明南極祥凝華祝之三
光燦北辰福歛箕疇之五紫雲旁布紅旭再中允哉
至治昌期洵矣邈隆盛際乃臣於安瀾覆盂之會竊
抱夫杞人漆室之思謂無虞乃虞聖明宜戒嚴倚仗
而已治益治忠良恒慮切憂危敢効金鏡于唐朝用
賣珠旒于聖世爰抒蕪語敬獻宸聰辭曰

聖明際運休嘉配天聿徵亶亶有懷拳拳相彼折膠兆

始赫炎敲蒸炙膚先應維霰治乃伏亂危肇于安失之
日曉辨于片言豫章干雲燾蘄其間欵器可鑒滿則傾
焉其應影響維幾幽潛明主燭隱爰剖微纖深居可樂
萬里曷宜登扇用起桑雍目前毋察淵魚群下黯黯毋
代走馬徃蹇來連翳此股肱心膂是傳誰傾鼎足而拄
危簷平臺召對國計共研豈伊形影乃冀纏綿剖琳獻
琅景彼群賢袞闕以補糾繆繩愆折檻何罪綴牘非嫌
忍同仗馬竟作寒蟬奔走禦侮有位共肩綦布星列靡
忝非荃誰空其署乃一其權睠此粲者心骨用靖獫狁

于襄西戎晏然獻俘在朝肉骨在邊轉輸上國鈍此戈
鋌隄防不預流血成川鎚銖尺寸膏脂可憐惟此不嗜
仍之虎冠磨牙厲吻瀕洞風旋盍亦振發鼓腹便便莽
賒溷矣其飛翩翩藏精收明何攻或堅周道坦坦王路
平平受天之佑億萬斯年

答潘昭度父母啓

馬之駿

伏以鱗鱗橫空驚鴈乍還于別浦瑤華墮地遊魚還溯
于流波感存記之罔遺欲敷宣而靡罄祇憑麻折聊代
荆班恭惟某官天錫琳球代傳縻戟鍾碧峴白蘋之勝

湖山聳峙千孤標羅清霜紫電之奇月露繽紛于藻思
奪席人推理窟聽經客卧隣家古鏡吟成無待十年之
牘銅符分去仍開四郭之花允如慈母之哺嬰兒遂以
才人而兼循吏雲霄閒放烏誰占魏闕之雙鳬鼓吹靜
釣簾獨對瓠池之亂鶩已見歌騰章袞行看武接台衡
某在水離奇爲駒歛段念燥髮而登仕版雖早偷造物
之龐然棘手而操筭鞭亦未落人倫之後獨以弓疑蛇
影驟冷轍覆羊腸澤畔吟魚空擷蕙蘭之秀車中載鬼
寧明薏苡之冤豈期咄咄之餘忽枉慙慙之問淋漓筆

墨欣聞韻叶于冰絲燦爛篚筐頓覺春滋于空谷悵金
鑒之獨酌愧繡段以難酬濡牘有懷臨淵同爰

九日泛苕溪詩序

胡胤嘉

壬寅同群輩讀書洛山山陡峭如削怯於躋陟德懋謀
以重九之日汎瀾苕上仲虺任酒炙之供先一日各以
家急散去孝瞻愆期日下春至余興敗盡張無彊吏之
二童子以百丈牽小艇溯奉口而上玄雷入候風日清
朗群峰摩天溪碧可鑑蒼翠之色撲於眉睫磬折數里
一山峙溪如渴猊丹楓燒赤水底倒映低徊久之不能

去達望叢篁爨烟渺渺小語可聞隱然桃源避秦人也
乃截流橫渡攝衣披蓑莽入見老人龐眉牽羊牧堤上
數椽洗滌蛩然足音矣時日薄崦嵫雲霞繡錯巒色峰
勢掩耀兢出微颺徐來波紋蕩漾如金在鎔船頭新月
湛湛欲墮慨然循影景意蕭條顧語孝瞻樂極悲來斯
言良然德懋輩引領勝游飛動不已掉臂去之恍如隔
世固人事難期一丘一壑亦自有緣凋謝何常來今可
念爲賦一詩聊識茲日若夫恒景汝南尚多憂患之心
宣武龍山祇矜落帽之謔有如我輩庶稱雅游

遊峴山漫記

胡胤嘉

葉水心評天下山水之美以吳興爲第一余足不能越
千里安敢妄斷其言每憶泛舟苕霅與矚心怡恍若拔
脚風塵之外如田父之嗜野芹自以爲至適矣丙午仲
冬同邵道載輦飲峴山之巔詠窪樽聯句詩發懷古之
感欲記其時日而未果戊申辛亥再過之去病羈北道
載溘逝賦二詩志愴壬子秋輾軻自佗於苕有君平之
問繫舟堤下風清水搖曠然夷遠峴山初名顯山晉太
守殷康侯始冠以亭迄唐易名爲峴堤濶三丈許甃以

文石雜以楊桃傲聖湖兩堤之制然圍抱山足隨勢錯
轉道場車蓋如几案浮塔如簪筆碧湖蕩潏無際葭葦
浴雨團烟飄曳湘薄此則聖湖所無也堤窮爲選佛場
佛閣負岡面湖幽豁交至惜圯倚不可登閣後微徑捫
蘿以上徑窮則滴翠萬籟矣逸老堂據峴之中三楹弘
敞太守陳公所葺也嘉靖丁未間劉司空麟與蔣司空
瑤顧司寇應祥吳憲副麟陳大叅良謨韋少叅商臣唐
比部樞爲香山洛社之會而郡佐築堂以延之非湖產
而與斯社者則崑山張納言寰也嗣後萬曆壬寅間先

師許司馬公復修其社集郡中冠蓋四十餘人春秋兩
會司馬沒此社亦不復舉矣罇石如伏猊背窪形如罇
唐開元別駕李適之亭其上以爲飲

大曆中顏真卿

作郡守公暇與同調李全白裴循等二十九人遊宴聯
句詩律五言人拈一韻顏爲首倡朽字殘文拂而讀之
使人神往如裴循之慕蕪掩前跡苔蘚餘舊痕王修甫
之遠水明疋練因晴見吳門劉茂之流霞方泔澹別鶴
遽翩翻皎然之覽事古典屬送人歸思繁陸羽之松深
引閑步葛弱供險捫丘甲中之花氣酒中醺雲華衣上

屯裴幼清之白日半巘岫清風滿丘樊顏須之去日往
如復換年涼代溫俱有深致客有疑窪樽無足寄興者
何來諸賢之賞適余曰別駕架亭偶寄一時魯公雅集
遂成絕唱世無百年之生而有千年之蹟無常勝之地
而有不朽之人金谷蘭亭亦復如是當時或時日和美
朋儕契偶山川增其靈秀風霞助其歡宴酒極望滄
洲邈然興言高詠器概千古若後之人追躡往踪刻所
以求鮮有領會者矣稍出則爲喜留亭亭更軒翥稱其
佳名亭下石疊如砌立壁似堵字以盤陀石趾嚙水密

柳覆之亦爲幽勝堤以內爲放生池唐肅宗詔天下置放生池凡八十一所顏真卿作碑記其領郡時已有矣此則倣其遺意爲之池上築禪室焚誦焉池方廣若干畝內外互通魚蝦潏沫出入其際無拘■之苦若武林蓮池上方則魚皆殯首待死更無生趣也所可恨者遺愛碑負半肩山嶺竹篠荒草互縈石骨大雅君子一爲芟除無慚西子何論虎丘千人座哉嗟夫元凱寄情於峴首右軍發慨於歐餘微言逸表嘯歎并集謝靈運詩云中爲天地物今爲鄙夫有夫豈必列簷入室方爲家

珍涉想猶存托情斯應雖同舟之人亦分得失苟會斯
言可以語游矣浩月墮船挹水濯襟命筆漫書以識勿
忘壬子仲秋十一日

不溪偶記

胡胤嘉

不溪襟帶清邑每過輒樂其清佳壬子孟秋偶得半日
閑蕩舟乾元山下板橋跨曲港水色如碧油桑竹映發
使人幽絕山麓平松萬株日影穿射涼風拂襟暑氣忽
滌去余里而近者南則超東則洛北則乾元金鷺互峙
爭高平時登陟常有怯懼之色今步山麓蓮在眉睫氣

已凌之矣樵子復指余坦道迤邐如蛇盤中亭再休下
視一邑不滿萬竈粉垣如畫茗水貫之螺髻之山若歧
若倚田苗正綠烟嵐雜起亦領人意去亭稍陡峻再折
而至前架一亭插檣爲藩其上兩楹中供太士香几潔
清不見人影簫聲雜笑語裊裊自空中出余澄坐久之
門榜高士菴蜀人陳侯效所題高士者漢吳羗宋沈麟
士也

後刪

復兩省設兵議

臧

昇

原名吳如

雉邑元旦之禍倉卒無備賊入如蹈無人之境向非顧

思義家丁過於城闔則賊悉脫網去矣於是邑士民惴惴有置兵彈壓之請良有由耳夫事非凡所見必駭而疑徃時兵來巡緝墮間市里若負芒刺實則不戢自焚亦古今通弊疑者亦未可盡非也欲受兵之利而亡兵之害將何術以處此不肖兄弟愚昧寡識烏足以與聞然地方事身家念殷敢不竭其管測一曰信地所云雙山置備平望遊徼者蓋以平望係蘇湖接壤雙山係宜長廣三地接壤兩省共勢須於界際置戍譏察聯絡意甚美矣然雙山實非襟喉之地也長邑自安吉梅溪諸

山迤邐盤旋東迄於湖之香山嘴將百里而近中間經
四安合溪永鎮等諸村聚由四安而上走廣德由合溪
而上至楊店走懸腳嶺則宜興之張渚走清達嶺則廣
德由水鎮而上啄木嶺則走宜興之湖汝由金村循湖
涓則走宜興之黃瀆皆通衢也別有幽蹊曲澗短阜巍
崗山民樵買苟越數十仞之險則已別境矣不啻數十
處也耿侯時於聯綿山頂設堠瞭視遺壘尚在幾百
里然此綦布之兵非一旅之任也自香山嘴循湖而南
至於小梅港亦數十里與湖比隣其近者僅一堤之隔

中間出口如夾浦等處亦二十餘所卽湖盜出沒之區也宜興烏溪定化寺口遙相接焉此一旅之任不能遍備明矣竊以爲今日之兵當資其聲以彈壓當廣其益於干振彈壓者非九閩之謂也居重地以控制明威足矣故曰莫若置備於邑然邑僅如斗大官舍學校廛市幾滿何所得隙地而置摠師之署卽幾百人亦何所置之而使之居有營處有聚與民不相擾久久各乂也竊見杭州都會甚大而羅木營乃遠在草橋門不使與官巷開市相雜豈無意耶謂宜于城外附郭之所如北門

北和橋外及西門紫荊橋外不妨去城數里相視要地之寬曠者內以護城而外當合溪等山路入城之孔道則聲勢足以相接而兵民不至於相軋或一道也至巡兵緝備之所不厭其廣宜於紫荊畫溪間置一船焉以備合溪宜廣于金蓮白溪間置一船焉以備夾浦宜與倉橋河泊間置一船焉以備湖藪而城之非官衙切近無一垣之隔宜于北門城河置一船焉以備越城令之早夜警視而陸則於合溪水次置一船焉水則于夾浦港口置一船焉以備奸民之入境者蓋二地于邑尤

近而行旅至此下水或可譏耳一日召募夫兵必使其
勢不可離而後有兵之用故無室家之累以繫心不
可久聚也取四方烏合以克其數不可得制也非惟無
益且以釀亂矣竊見各邑有民壯若干名原以昔年海
警爲防盜乘城而設今乃混于捕快之列于縣衙祇候
而已宜卽於此項抽出以復初設之意不願者聽而去
之老弱者汰而易之又卽仿其意以募本土之人充其
役而足其數市棍狡徒不得參焉使合伍之人皆鄉民
之有室家而壯實者則無鳥散獸噬之慮矣然其數固

不必多也今計巡視近城凡四船船二十人每更四人鼓棹擊柝而足合溪夾浦則每船十人而足此須百人而伍長隊長不與焉餘可更置百人以休番其不在船者以供戎署戒嚴擁衛亦足以無乏而凡守戎之蒞是任者又必額設家丁若干名糧亦勿令踰常額使爲親兵足以主客相制農隙時以家丁教練士兵令之可用然此儕非有廬竈不能寧居藉使無事而浪遊城市則必有爭攘之禍宜于戎署左右量設營房以聚而轄之且旣已役于官則宜厚其糈家丁自來優厚所謂將必

有所私之士方可得其死力而衆兵亦必饒其生計方可責之以操練其有田蠶本事者不妨量與之假而賭博酗戾者嚴禁焉兵責諸長長責諸統師者精明令長于是稽核游戎都閫于是考成庶戎紀肅而不致貽害耳旣設其半於長興更設其半於宜興而游戎以統之卽兩省率然之勢也所最急者有兵卽有餉今長邑自東事加餉以來民力殫久矣商賈山澤之括已無遺策莫可增者惟聞近有裁冗官之議亦可爲一助其民壯之轉替所補亦無幾且此兵署旣建無有已時則剏始

之費及每年供億常額非有成畫不可此原非一邑之事兩省協備郡城屏翰係焉或謀協濟或取正供庶可久耳若夫搜括郡移爲剝始之助則在不避勞怨斷然行之固非編民所及知亦非科派之謂也別有臆說于此以補兵所不及則無如保甲蓋保甲者家比而戶櫛之勿群聚不逞勿藏匿遠逋甲之長鄉之老得時稽察有者以告官司嚴爲申飭犯者同罪則奸亡無所容矣凡遠來之偷必主於偷家而同里閭保老未有不知偷主名者所患上忽爲故事下亦謾以虛文耳昔筠塘陳

公祖壇石熊父母端以此法精選保老之有身家者而
責之司察奸宄其時野有栖穗境亡盜賊至今思之使
一邑行此則一邑靖矣使江以南行此則江南俱靖矣
故備兵之疎也不若保甲之密也置兵所以爲聲也保
甲所以爲實也惟當事加意焉地方幸甚

德清澈溪嵇氏族譜序

謝先申

氏若姓非一矣古合焉而氏冒姓姓淆氏矣則豈知姓
或以異氏或以同氏姓之同或以名而異故以實乎故
姓於氏可代呼而氏於姓不代呼者別之也何別貴賤

氏賤則名氏名同則婚姻可通而氏之姓同則不通微
矣哉祖姓宗氏之道須慎辨之也宗氏則稽氏斯譜其
避與非凡所侈遠張族非凡所離實誣先者矣夫稽之
爲稽也故以地而稽若奚之改而稽也豈氏異哉稽祖
妣奚祖任其姓異耳其支會稽而氏稽或嵇則其後夏
之季行者非然則其後漢之徙譙者其支經之嵇山而
氏焉者則其後嵇康者然康之先故奚氏後也避怨而
後乃氏也其爲奚仲之薛而奚其爲簿奚氏之改而奚
康亦未諦所宗也而望則出譙國矣迄今言譙國郡者

於稽嵇任奴之別不其惜乎哉祖遙莫辨其始孰如世
邇而宗乃可明明宗則不追祖祖以尊不合族族以類
是譜義也誰則有之吾今乃見諸司李嵇公矣公王考
之創而譜也遙而高郵出宗弗宗又遙而中散疑宗弗
宗又遙而季杼成宗弗宗獨宗其落澈溪者惡乎率哉
或以逃無其徵疑疑以逸無其徵出而出之自高郵也
傳夫耳受而目無稽則寧若其信信寧若徵其落葉脫
於枝而歸根於土樹孫枝於地而幹之生也復本於枝
此其宗落也其無冒遠之謬乎吾聞璉市之嵇有太史

焉嘗溯所肇而與澈溪之族合公之考義不欲附蓋懼
誤也夫誤豈直疑焉爾哉傳與聞交異則徵其徵交闕
則徵其無徵交疑則無徵其必徵乃淳安汪氏之譜則
有異溯其身而上至魯公之族且七十餘世矣而諱字
卒葬歷然如目注則其詳也殆不勝僞嗚呼僞詳則誣
若祖誣則悖本矣夫人必及其始本始必貴其真公則
自伯八公以來代不溢質惟真焉斯述之已耳予小
子讀其義例則知世系之氣脉一焉而無誤祖之爽則
知行第之褒貶寓焉而有勸善之憲則知太傳外傳之

章懿貞範焉而不爲浮實之譽則又知祀產之所以繼
孝則又知文秉之所以興稽而譜法具其都矣譜也者
所以序世統資周普也弗普則奚其都是公所爲慎乎
鄰僞也公於族蓋嘗武其存仁公世麟公若其王考若
考而敦爾睦焉眎宗若身慮或痺恭兄若父慮或墜奉
嫂若毋慮或怠畜弟若子慮或猶其周詳檢慎子愛廉
潔以則其祖考焉慮或替卽司刑而諷刺若痾得情則
哀卽寧出不經而不入無告焉慮或冤抑不當乎平反
斯其具譜心哉仍譜心譜義乃以行徹譜義譜文乃足

術夫是謂之真譜世微是普心而顧文焉是飾則未耳
是故尊祖莫善乎敬身身所出若出所出若所同出若
出所同出而人不知所出禪續則不敬不敬則不尊然
必綱之以祠祀紀之以宗法署善以春薦褒錄惡以秋
薦貶以是義例格其來昆格則削之而不格則終筆之
俾行與德迭尊者以月書誨迪之則人善而善族其可
不然祖詒不必淑孫族衍不必賢類而况資削方之例
乎何以幾守且必傳也夫人善若公則雖無譜收族將
百世傳而冠氏矣矧其身先教後矧其睦先收後矧其

以質人系質事則其質情有不與質義符哉是可世勿替矣似續之者尚亦率公善以爲諸宗乎

答雲南撫院閔曾泉書

魏大中

台臺靖霑益東川烏撒普安之不靖而又悉索滇甲以援黔以待黔師于境上乃黔之爲黔者遂已不可問也滇之出不足供滇之軍黔不能自供又無以供援黔之軍仰之楚楚不應叩之帑帑不應司農司馬左支右吾誰知天末萬里有勞臣如此其盡力于封疆者哉顧遼惟其去京師尺五也封疆之臣之耳目不注于奴與虜

而注于輦轂之下其視聽亂其思慮分卒底于敗滇惟其天末萬里也輦轂之下之視聽所不及封疆之臣可一意於萬分難爲之中爲所欲爲爲所得爲而底于成所預爲台臺賀者此也

心厂血書華嚴疏

沈師昌

茗雪間故多名山其蓮社之尤著者則無如福山禪院福山爲石機和尚所開創凡名勝行腳至止無不思結廬其旁而石機亦復具眼不必人盡淨土卽禪客律師種種行門其魁然傑然者咸稽首請住以故福山社甲

于茗雪而松龕竹閣若蒼布星羅綦盛矣西蜀心匠師
勇猛無二初入社欲血書華嚴經是經爲卷八十一刺
十指血僅如縷度不易竟遂舉刀刺骨師尋仆地久始
蘇長跽白佛書成當燃兩指爲供自此每刺泉湧不半
歲成帙欣然燃指是爲第一願比游五臺復作是念言
我此幻軀同于電露世人血書不病則夭迄乎無成所
爲信力少耳我既具信根疾得成就且也神愈王無異
未出血時請再書一通以報佛恩且欲以顯佛之威德
也于是剗刃于臂于耳于舌亦不半歲成帙是爲第二

願今復將有事峨眉普賢示現處也心厂作而嘆曰行門盡于華嚴矣我敢愛華囊而發他誓願乎欲徒步入川瀝血作佛事石機與余言余聞而悲之且虞其道敝而中乾也謂不若仍留福山書寫須其成齋至峨眉便石機曰心厂所乏紙耳居士能爲募金市紙彼不惜以身作墨我亦不難借福山爲峨眉也余曰如是如是心厂合掌謝曰果與居士有緣便當留此今日紙至卽今日書余益驚怖嘆未曾有是爲第三願于時丙午之冬十月也今且幾半歲矣他緣簿堆積案間如山未暇圖

及此大負心丁哉茲將過福山計側理裝潢之費可二十金敢告之戚友能共成此緣者與心丁析皮鑽骨功行無二無別然師勇猛甚期于今歲圓滿諸善信有所喜助幸卽慨發一以省索施之煩一以滿書經之願爲德不淺如其以空名應所求而曰姑俟之異日也余不任奔走心丁亦不能少待則請無題姓名爲矣

蕪葭舍記

閔光德

吾廬之東五里許有藪曰上陂田疇夷曠而邇迤前溪餘英餘不諸溪之水載經載緯湯湯乎灑諸此而成澤

翠漱浴月激波涵空層洲複沚淺瀨深涯回互曲折旅
蒲蓴蔣苳爲灌莽而葭莼特甚北望官塘與颿影相映
帶綠岸柳陰四合繆藤縹緹疏垂於水際每漁笛數聲
菱歌間發恍乎非塵境也一丘據其要面巽而負乾駢
植松杉檜栢鬱然蔥然爲漚影菴余所卜長夜之藏也
菴之東屋一區榜曰菴葭舍由曲徑入庭前花木不數
種亦不蹇於目有亭臨之曰玉濤亭之上曰秋聲閣朱
欄畫檻四望無際閣外曲房數間啓北扉軒曰戲鵞而
一池如玦旁甃竒石嵌空水從石罅與澤相灌注中栽

蕭蕭夾池芙蓉碧梧數本綠竹一叢竹外槿籬環之余
既爲不鳴之雁益厭世俗之糾紛遂託趾焉入而處于
舍之中儒之瑤編釋之貝多道之薤簞與夫子史百家
之曼衍環奇克焉而怡我神也出而遊于舍之外飛鳥
之鳴暉遊魚之噉嚼雲烟之變幻山川之縈廻與夫百
昌衆卉之摛原繡野燦焉而溢吾目也遠而矚夫舍之
四周孺山有徐穉之逸軌戴山有仲若之遐標道場有
如訥之高踪歸雲有太初之令范吊子胥于伍林懷康
樂於福田卓焉而矚我以景行也之數者洵足老吾矣

而獨取義于蒹葭者何居豈其管可育其灰可測其花
可絮其質可然爲照可浮爲航可緯爲薄爲簾爲蕭有
全于其用耶其紫籜宜春翠陰宜夏蒼葉宜秋繁花宜
月蕭疎宜風籠烟罩霧宜雨有會于其景耶其苞生似
義披拂似仁低昂似禮音韻似樂勁挺似勇茁萎惟時
似信有貴于其德耶吾惡乎知之而惡乎樂之蓋嘗誦
秦人之詩有在水一方而邈邈遊杳不可得者是吾
侶也吾家子騫出于蒹葭之中入于夫子之門而粹然
肥也我師也吾知勉矣所得於蒹葭者多矣不然是

長物耳而俊構焉炫巧焉不幾爲我心之脉望乎

與董遐周表弟書

范夫人

金昌把袂楊柳如絲金桐花落滿銀床矣飛光流駛黯
然傷神天外王孫能不心旌搖曳轉盼征車關山迢遞
便欲哽咽耳兩承華札慰存叮嚀欸曲出自滿腦肥腸
自非一脉至情何能相念若此令人且誦且悲不覺涕
泗交睫也伏審途次舟車安適玉體康勝深慰鄙懷捧
誦來章知壯遊行李生色江山入目便動吟懷明月光
映陸離矣邇者文場雄戰定奪錦標我外祖家聲年來

見彫於造物所望展頭角光前業者在吾弟一人以弟
英奇磊砢視一第如承蜩此時五色天章已點朱衣綵
筆寄來瑤篇如傾國名花姿態橫出大物定歸摩雲之
手翹首佳音喜可知也月初偶得一夢見弟瀕行持一
幅錦索予作贈行詩錦上似有雲霞煥爛題詠滿幅中
間止月字邊有空處予濫書四行前二句已忘之止憶
後二句云夢裏不知身是客吹來玉笛滿關山醒時猶
覺了了此夢甚奇當是佳兆則吾弟高捷神人已先示
矣承示以契達生之旨愁城都付維摩處置肯哉斯言

便如浥清涼甘露足使火宅生津但以蓬髮飄霜未免
桑榆之歎秋林飛素殊深風木之悲佩服嘉言更增悲
感惟持扇頭佳什披覽芳華出入懷袖便覺俗障塵魔
灑灑拂去耳夏初禮天竺還承賢夫人及令嫂夫人駕
臨中路艤舟竟日杯酒留連罄吐衷曲骨肉久別乍聚
不覺悲喜交集僧照亦依依膝前承母顏藹然如舊似
有夙根耳吾弟旅寓蕭齋得無岑寂昭王臺下多士如
雲不審亦有知己作伴否長安早秋朔風侵人如箭幸
甚自珍攝